



I. PRINCIPADO DE ASTURIAS

• OTRAS DISPOSICIONES

CONSEYERÍA D'EDUCACIÓN, CULTURA Y DEPORTE (IX LEGISLATURA)

RESOLUCIÓN de 24 de xunetu del 2015, de la Conseyería d'Educación, Cultura y Deporte, pola que se convoquen los premios «Xosefa Xovellanos» de Novela, «Xuan M.^a Acebal» de Poesía, «Máximo Fuertes Acevedo» d'Ensayu y «María Josefa Canellada» de Lliteratura Infantil/Xuvenil en llingua asturiana.

Fomentar la creatividá lliteraria contribuye ensin dulda nenguna a desenvolver el conteníu cultural de la sociedá, sobre manera teniendo en cuenta la importancia de la lliteratura, en cualquier de les tantes de manifestaciones que tien nel nuestro tiempu. Ye bien sabíu tamién que la escritura, que surge de la voluntá de creación y comunicación, lleva con ella un trabayu personal importante, una dedicación de tiempu y esfuerciu que, ensin ser midibles no económico porque'l valir propiu de la lliteratura trescien de talos parámetros, sí que se puen reconocer y incentivar polos poderes públicos. Por ello, la Conseyería d'Educación, Cultura y Deporte del Principáu d'Asturies vien convocando con calter anual dellos premios lliterarios dirixíos a consolidar, arriquecer y prestixar la llingua y cultura asturianas.

Fechos

Primeru.—Cola mira de llograr esti oxetivu, por Resolución d'esta Conseyería de 5 de marzu del 2009 (BOPA de 27 de marzu del 2009), aprobáronse les bases de los premios «Xosefa Xovellanos» de Novela, «Xuan María Acebal» de Poesía, «Máximo Fuertes Acevedo» d'Ensayu, «María Josefa Canellada» de Lliteratura Infantil/Xuvenil y «Alfonso Iglesias» de Cómic en llingua asturiana.

Segundu.—Na Llei del Principáu d'Asturies 11/2014, de 29 d'avientu, de Presupuestos Xenerales del Principáu d'Asturies pal añu 2015, hai creitu específicu pa estos fines na partida presupuestaria 14.04.422R-482.062, denomáu "Premios literarios en lengua asturiana". Y el Plan Estratéxicu de Subvenciones de la Conseyería d'Educación, Cultura y Deporte pal exerciciu 2015 (aprobáu por Resolución de 16 de febreru del 2015 y publicáu nel BOPA de 26 de febreru) prevé la convocatoria de los cinco gallardones mentaos. Por tanto, procede agora la convocatoria de los premios siguientes:

- Premiu «Xosefa Xovellanos» de Novela n'asturianu na so trixésima sesta edición;
- Premiu «Xuan M.^a Acebal» de Poesía n'asturianu na so vixésima primera edición;
- Premiu «Máximo Fuertes Acevedo» d'Ensayu n'asturianu na so vixésima primera edición; y
- Premiu «María Josefa Canellada» de Lliteratura Infantil/Xuvenil n'asturianu na so octava edición

enfotaos en qu'actuaciones d'esti calter contribuyen de manera eficaz a dinamizar l'actividá cultural de la Comunidá Autónoma, y n'especial un aspectu bien importante de la mesma como ye'l de la creación lliteraria.

Terceru.—Acordies cola Resolución de 16 de mayu del 2005, de la Conseyería d'Economía y Alministración Pública, pola que s'establez el sistema d'información contable de l'Alministración del Principáu d'Asturies y el so sector públicu y s'aprueben les normes de los procedimientos de xestión, tramitación y réxime de contabilidá na execución del presupuestu de gastos, la Intervención Delegada, en data 23 de xunetu del 2015, emitió'l correspondiente informe fiscal favorable.

Fundamentos de derechu

Primeru.—L'artículu 3 del Decretu 71/92, de 29 d'ochobre, que regula'l Réxime Xeneral de Subvenciones, en rrellación col artículu 38 de la Llei 6/1984, de 5 de xunetu, del Presidente y del Conseyu de Gobiernu, l'artículu 5 del Decretu 4/2012, de 26 de mayu, de Reestructuración de les Conseyerías qu'integren la Comunidá Autónoma, mesmo que l'artículu 10 de la Llei 2/1995, de 13 de marzu, sobre Réxime Xurídicu de l'Alministración del Principáu d'Asturies; too ello no tocante a la determinación de les competencies y facultaes p'adoptar la presente Resolución.

Segundu.—L'artículu 41 del Testu refundíu del Réxime Económicu y Presupuestariu del Principáu d'Asturies, aprobáu por Decretu Llexislativu 2/1998, de 25 de xunu, no que fai a la competencia de los titulares de les Conseyerías p'autorizar y disponer los gastos propios de los servicios del so cargu y de los qu'estableza la Llei de Presupuestos Xenerales de cada exerciciu o, nel so defectu, la del exerciciu anterior, hasta la cantidá fixada nesta.

Terceru.—Ye aplicable lo estableció na Llei 38/2003, de 17 de payares, Xeneral de Subvenciones y el Decretu 71/1992, de 29 d'ochobre, de Réxime Xeneral de Concesión de Subvenciones.

En base a lo acabante esponer y acordies colo previsto nos artículos 8 c) y 41 del Testu refundíu del Réxime Económicu y Presupuestariu, aprobáu pol Decretu Llexislativu del Principáu d'Asturies 2/1998, de 25 de xunu, pola presente



RESUELVO

Primeru.—Convocar los premios siguientes:

- «Xosefa Xovellanos» de novela n'asturianu (trixésima sesta edición), con una dotación de 3.000 (tres mil) euros, pa obres de tema, xéneru y estructura llibres que tengan una estensión mínima de setenta y cinco páxines a espaciu doble.
- «Xuan M.^a Acebal» de poesía n'asturianu (vixésima primera edición), con una dotación de 3.000 (tres mil) euros, pa obres de tema, xéneru y estructura llibres que tengan una estensión mínima de quinientos versos.
- «Máximo Fuertes Acevedo» d'ensayu n'asturianu (vixésima primera edición), con una dotación de 3.000 (tres mil) euros, pa obres de tema, xéneru y estructura llibres que sían inédites y tengan una estensión mínima de cincuenta páxines escritas a espaciu doble.
- «María Josefa Canellada» de lliteratura infantil y xuvenil n'asturianu (octava edición), con una dotación de 3.000 (tres mil) euros, pa obres de lliteratura infantil o xuvenil —con independencia de que sían noveles, compilaciones de cuentos, poemarios o obres de teatru— una y buenes sían inédites y tengan una estensión mínima de doscientos cincuenta versos pa la poesía y de trenta páxines a espaciu doble pa los demás xéneros.

Segundu.—Autorizar un gastu por importe de 12.000 (doce mil) euros con cargu a l'aplicación presupuestaria 14.04.422R-482.062 de los Presupuestos Xenerales del Principáu d'Asturies pal 2015.

Terceru.—Esta convocatoria va mandase poles bases reguladores aprobaes por Resolución de 5 de marzu del 2009 (BOPA de 27 de marzu del 2009) de la Consejería de Cultura y Turismu.

Cuartu.—Presentación d'orixinales, situ y plazu.

Les obres tienen que se presentar nel Rexistru Xeneral Central de l'Alministración del Principáu d'Asturies (Edificiu Alministrativu, c/ Coronel Aranda, e/n, planta plaza, sector central, Uviéu) hasta'l día 10 d'ochobre —inclusive— del 2015, en dos sobres cerraos onde tien que s'escribir el nome del Premiu y tien que se facer constar el títulu de la obra y l'alcuñu del autor. Caún de los sobres tien qu'incluyir:

- Sobre A: datos del autor/a (señes, teléfonu y un currículum d'estensión curtia);
- Sobre B: orixinal y cuatro copies del testu (en formatu papel).

Tamién pue presentase esta documentación per cualquiera de los sistemes establecíos n'artículo 38.4 de la Llei de Réxime Xurídicu de les Alministraciones Públiques y del Procedimientu Alministrativu Común. Si, usando esti derechu, l'espedito únviase per corréu, habrá que lu presentar en sobre abiertu pa que'l personal de correos feche y selle la solicitú primero de que se certifique.

Quintu.—Los premios van ser concedíos acordies colos principios d'oxetividá, tresporencia, igualdá, non discriminación y publicidá, per aciu del procedimientu de concurrencia competitiva.

Sestu.—El Serviciu de Política Llingüística, dependiente de la Dirección Xeneral de Política Llingüística de la Consejería d'Educación, Cultura y Deporte, va adoptar toles midíes necesaries pal desarrollu de les bases y d'esta convocatoria, llevando alantre la ordenación y instrucción del procedimientu. La Conseyera d'Educación, Cultura y Deporte va dictar la resolución de concesión, que va publicase nel *Boletín Oficial del Principáu d'Asturies*, colo que va considerase notificada acordies lo establecío nel artículo 59.6b) de la Llei 30/92, de 26 de payares.

Séptimu.—Ordenar la publicación d'esta Resolución nel *Boletín Oficial del Principáu d'Asturies*.

Octavu.—Esta Resolución termina la vía alministrativa y va poder ser recurrida potestativamente en reposición, énte la conseyera d'Educación, Cultura y Deporte, nel plazu d'un mes computáu dende'l día siguiente al de publicación de la presente resolución nel *Boletín Oficial del Principáu d'Asturies*, o ser directamente impugnada énte la Sala de lo Contencioso-Alministrativu del Tribunal Superior de Xusticia d'Asturies, nel plazu de dos meses contaos dende la publicación de la resolución, ensin perjuiciu de cualesquier otru recursu que consideren procedente interponer na defensa de los sos intereses.

Oviedo, 24 de xunetu del 2015.—La Conseyera d'Educación, Cultura y Deporte, Ana González Rodríguez.—Cód. 2015-12524.